

Siunnersuummut nassuiaatit

Nalinginnaasumik nassuiaatit

1. Aallarniut

Biilinit innaallagissamik ingerlatilinnut, brintimik ingerlatilinnut aamma plug-in hybridbiilinit akitsuutinik akiliinnngikkallarnissaq kontomut pingaarnermut 24.11.10 aamma 24.11.11-mut oqaasertaliussat naapertorlugit 1. januar 2020-imi atorunnaassaaq.

Biilit innaallagissamik ingerlateqartut ineriartornerat siuariartorluartoq nunarsuaq tamakkerlugu takuneqarsinnaavoq, ilaatigullu illoqarfinni annerusuni arlalinni biilit dieselimik ingerlateqartut atorunnaarsivinnissaannut suliniuteqartoqarpoq. Assersuutigalugu Kinap, Frankrigip Tuluillu Nunaata 2030-mit 2040-mut biilit benziinamik dieselimillu ingerlateqartut inerteqqutigineqarnissaat siunniuppaat.

Biilit innaallagissamik ingerlateqartut Nuummi illoqarfinnilu anginerusuni allani qamutinit motorilinnut nalinginnaasunut sanilliullugu ullumikkut atorneqarsinnaareerput. Taamaammallu biilit innaallagissamik ingerlateqartut ilimagineqaqqaartumit siusinnerusukkut biilinit annertunerusumik akuunissaat naatsorsuutigineqarsinnaavoq. Tamanna tunngavigalugu biilit innaallagissamik ingerlateqartut, brintimik ingerlateqartut kiisalu plug-in hybridbiilit ulloq 1. januar 2020-imit atuutilersumik akitsuusersugaalernissaat siunnersuutigineqarpoq.

2. Inatsisissatut siunnersuutip imarisai pingaarnertit

Qamutit motorillit taamaallaat innaallagissamik brintimillu ingerlateqartut kiisalu plug-in hybridbiilit, batteriinik immeqqittakkanik nukissiamut katersivillit ullumikkut qamutit motorillit taamaallaat innaallagissamik brintimillu ingerlatillit eqqunneqarneranni nioqqutis-sanik eqqussuinermi akitsuummik aamma qamutit motorillit akileraarutaannut ilaatinneqanngillat, takuuk 2019-imut Aningaasanut Inatsimmi konto pingaarnernut 24.11.10 aamma 24.11.11 oqaasertaliussat.

Biilit innaallagissamik ingerlatillit, brintimik ingerlatillit kiisalu plug-in hybridbiilit akileraaruserneqarnissaat siunnersuutigineqarpoq, biilit ullumikkut Nuummi illoqarfinnilu annerusuni allani qamutinit motorilinnut nalinginnaasunut immikkut piviusorsioortumik periarfissaapput, taakkunanimi attaveqaatitigut atortussiaat pigineqarput, tassani batteriinit immiiviit ilanngullugit. Siunnersuutigineqarpoq akileraarut biilinit nalinginnaasunut akileraarutip 50 %-ianut angissusilerneqassasoq aammalu plug-in hybridbiilit akileraarutaat

tamatuma kingorna 2025 tikillugu ukiumut 10 procentpointimik qaffakkiartuaartinneqassasoq, taamaalillutillu plug-in hybridbiilit 2025-imit akileraarummik tamakkiisumik akiliisalissallutik. Qamutilli motorillit, taamaallaat innaallagissamik brintimilluunniit ingerlatillit, akileraarutaasa 50 %-iunissaa aalajangiusimaneqarpoq.

Aammattaaq qamutit motorillit nunakkoortit mikinerit snescooterillu qamutinik motorilinnik akitsuuteqartussaataasunik nalunaarsorsimaffimmut ilanngunneqassasut siunnersuutigineqarpoq. Taamaattorli akitsuut kr. 0,00-inut aalajangersarneqarpoq. Ullumikkut qamutinut motorilinnut nunakkoortinut mikinernut akitsuutit qamutinut motorilinnut sisamanik assakaasulinnut akitsuutit annertoqatigaat.

Qamutit motorillit akileraarutaannik akiliiffissatut piffissaliussap kinguartitaanerata sunniutigisarpaa, akiliisussat ilaasa akiliinissaminnik ullut akiligassanngorfusut 1. aprilip aamma 1. oktoberip kingorna qaammatip ulluisa 20-annut utaqqissussisarnerat, taamaaliornermikkullu akileraarutit akilernerqarnissaannut piffissami tassani akissaaruteratarsinnaasarlutik. Taamaammatt siunnersuutigineqarpoq piffissaliussaq sivitsugaq allanngortinneqassasoq, taamaalilluni kingusinnerpaamik qaammatip ulluani kingullermi akiliisoqartarluni. Ullut akiligassanngorfissat ullorlu piffissaagallartillugu akiliiffissaq kingulleq siunnersuut manna malillugu tassaassapput ulloq 30. april aamma 31. oktober.

Politiit biiliisa qamutit motorillit akileraarutaannik akiliisussaanninnerat inatsimmi erseqqissarneqassasoq siunnersuutigineqarpoq. Tamanna maannamut periaasiusumik inatsimmut ilanngussineruvoq, qamutimmi motorillit akileraarutaat akileraaruseriffiup politiit biiliinut tunngatillugu akiligassiissutigisanngimmagu. Taamak periaaseqalersimaneq politiit annaassiniarnermittaaq imaluunniit annaassiniarnermut assingusunik amerlasuutigut suliaqartussaasarnerannik, tamannalu § 1, imm. 2, nr. 1-imi pineqartunut ilaasutut isigineqarneranik pissuteqarpoq. Politiit biilii annaassiniarnerup saniatigut allarpassuarnut atorneqartarput, soorlu alapernaarsuinermut imaluunniit isertitsivimmiittunik tigummigallagaasunilluunniit angallassinermut.

Tuttuuteqarfiit savaateqarfiillu ilaasa nunaqarfiit illoqarfiillu killiisa iluanniissinnaanerat pissutigalugu qamutinut motorilinnut savaateqarnermi tuttuuteqarnermilu ingerlatsinermi atorneqartunut killilersuinerup erseqqissarneqarnissaa pisariaqarsimavoq. Siunnersuutigineqarpoq qamutit motorillit savaateqarnermik tuttuuteqarnermillu inuussutissarsiornermut atorneqartut, nunaqarfiup imaluunniit illoqarfiup killingata iluaniippata akitsuusersorneqassanngitsut. Allannguummilli tamatuminna qamutit motorillit akitsuusigaanngitsut ikalisarnissaat anguniarneqanngilaq.

Siunnersuut inatsimmut atuuttumut sanilliullugu	
Oqaasertai atuuttut	Inatsisissatut siunnersuut
	§ 1

	<p>Qamutit motorillit akileraarutaat pillugit Inatsisartut inatsisaanni nr. 3, 16. juni 1987-imeer-sumi, ilaatigut Inatsisartut inatsisaatigut nr. 7, 11. november 2004-meersukkut, Inatsisartut inatsisaatigut nr. 10, 3. december 2012-imeersukkut, kingullermillu Inatsisartut inatsisaatigut nr. 8, 29. november 2013-imeersukkut allangortinneqartumi makku allannguutigittinneqarput:</p>
<p>§ 1, imm. 2. Akileraarummilli akiliisussaangitsut tassaapput:</p> <ol style="list-style-type: none"> 1) qamutit motorillit qatserutit annaassiniutillu, 2) napparsimmaveqarfiup napparsimasunik angallassissutai, 3) qamutit motorillit nunat allamiut aallartitaqarfiinit imaluunniit konsuleqarfiinit imaluunniit aallartitaqarfimmi sulisunit qallunaatut innuttaassuseqanngitsunit pigineqartut, aammalu 4) qamutit motorillit savaatillit tuttuutillillu sulinerannut atorneqartartut, savaateqarfiit tuttuuteqarfiillu illoqarfiit nunaqarfiillu avataanni inissisimasut sumiiffinnilu taak-kunani qamutit motorillit arlaqanngitsuinnaat pigineqarputa. 	<p>1. § 1, imm. 2 ima oqaasertalerneqassaaq: ”Imm. 2. Akitsuuserneqartussaangitsut makkuupput:</p> <ol style="list-style-type: none"> 1) qamutit motorillit qatserutit annaassiniutillu kiisalu qamutit motorillit ikiuiartorasuaatit politiillu biilli, 2) napparsimmaveqarfiup napparsimasunik angallassissutai, 3) qamutit motorillit nunat allamiut aallartitaqarfiinit imaluunniit konsuleqarfiinit imaluunniit aallartitaqarfinni sulisunit qallunaatut innuuttaassuseqanngitsunit pigineqartut, aamma 4) qamutit motorillit, savaateqarnermik, nersussuaateqarnermik tuttuuteqarnermilluunniit inuussutissarsiornermut assigisaannullu sulinermut atatillugu pigineqartut atorneqartullu.”
<p>§ 2, imm. 1. Akileraarutit ukiumut angissuseqarput:</p> <ol style="list-style-type: none"> 1) Qamutit motorillit 1.000 kg-t angullugit oqimaassusillit: kr. 6.554. 2) Qamutit motorillit 1.001 kg-niit 1.200 kg-t angullugit oqimaassusillit: kr. 10.049. 3) Qamutit motorillit 1.201 kg-niit 1.500 kg-t angullugit oqimaassusillit: kr. 10.747. 4) Qamutit motorillit 1.501 kg-niit 1.800 	<p>2. § 2, imm. 1 ima oqaasertalerneqassaaq: ” Akileraarutit ukiumut angissuseqarput:</p> <ol style="list-style-type: none"> 1) Qamutit motorillit 1.000 kg tikillugu oqimaassusillit: kr. 6554. Qamutilli motorillit, taamaallaat innaallagissamik brintimilluunniit ingerlatillit, taakku taamaallaat 50 %-iinik. 2) Qamutit motorillit 1.001 kg-mit 1.200 kg-mut oqimaassusillit: kr. 10.049.

<p>kg-t angullugit oqimaassusillit: kr. 15.231.</p> <p>5) Qamutit motorillit 1.800 kg sinnerlugit oqimaassusillit: kr. 17.575.</p> <p>6) Motorcykelit: kr. 3.540.</p>	<p>Qamutilli motorillit, taamaallaat innaallagissamik brintimilluunniit ingerlatillit, taakku taamaallaat 50 %-iinik.</p> <p>3) Qamutit motorillit 1.201 kg-mit 1.500 kg-mut oqimaassusillit: kr. 10.747.</p> <p>Qamutilli motorillit, taamaallaat innaallagissamik brintimilluunniit ingerlatillit, taakku taamaallaat 50 %-iinik.</p> <p>4) Qamutit motorillit 1.501 kg-mit 1.800 kg-mut: kr. 15.231. Qamutilli motorillit, taamaallaat innaallagissamik brintimilluunniit ingerlatillit, taakku taamaallaat 50 %-iinik.</p> <p>5) Qamutit motorillit 1.801 kg-mit oqimaassusillit: kr. 17.575. Qamutilli motorillit, taamaallaat innaallagissamik brintimilluunniit ingerlatillit, taakku taamaallaat 50 %-iinik.</p> <p>6) Motorcykelit: kr. 3.540.</p> <p>7) qamutit motorillit nunakoorutit mikinerit sisamanik amerlanernilluunniit assakaasullit: kr. 0,00.</p> <p>8) Snescooterit: kr. 0,00.</p>
<p>§ 2, imm. 2.</p> <p><i>Imm. 2.</i> Akileraarutit, ukioq affakkaarlugu siumut akilerneqartartussat 1. april aamma 1. oktober akiligassanngortassapput, piffissaagallartillugu akiliiffissaq tassaalluni qaammammi akiliiffissami ullut 20-issaat. Piffissaagallartillugu akiliiffissaq nalliuttuuppat arfininngornerullunuunniit akiliiffissaq ulluinnarmut tullermut kinguartinneqassaaq.</p>	<p>3. § 2, imm. 2 ima oqaasertalerneqassaaq: ”<i>Imm. 2.</i> Akileraarutit ukioq affakkaarlugu siumut akilerneqartartussat 1. april aamma 1. oktober akiligassanngortassapput, piffissaagallartillugu akiliiffissaq tassaalluni 30. april aammalu 31. oktober. Piffissaagallartillugu akiliiffissaq arfininngorneruppat, sapaatiuppat nalliuttuuppalluunniit akiliiffissaq ulluinnarmut tullermut kinguartinneqassaaq.”</p>
<p>§ 2, imm. 4.</p> <p><i>Imm. 4.</i> Akileraarutinut akiligassat akilerneqanngitsut Kalaallit Nunaanni eqqartuussisarnermi inatsimmi kap. 7, akileraarutit akitsuutillu piumasarineqartut pinngitsaaliinikkut akilersinniarneqarsinnaaneriniq imaqartoq, tassani ilaalluni aningaasat akiligassalimmuut</p>	<p>4. § 2, imm. 4 ima oqaasertalerneqassaaq: ” <i>Imm. 4.</i> Akitsuutinut akiligassat Kalaallit Nunaanni eqqartuussisarneq pillugu inatsimmi kap. 47 akileraarutinut akitsiitinnullu akiligassat pinngitsaaliilluni akiliisitsinermi malittarisassat naapertorlugit pinngitsaaliissumik akilersinneqarsinnaapput.”</p>

<p>tunniunneqartut unerartitsiffigineqarsinnaanerat, naapertorlugu akilersinniarneqarsinnaapput.</p>	
	<p>5. Inatsisartut inatsisaata danskisuuani tamarmi "Landsstyret" ima allanngortinneqassaaq: "Naalakkersuisut".</p>
	<p style="text-align: center;">§ 2</p> <p>Inatsisartut inatsisaat ulloq 1. januar 2020 atuutilissaaq, aammalu siullerpaamik atuutissalluni piffissamut akileraarfiusumut 1. april 2020-imiit 30. september 2020-imut tunngatillugu akileraarutissamut ullormi 1. april 2020-imi akiligassanngortussamut.</p> <p><i>Imm. 2.</i> Plug-in hybridbiilit piffissami akileraarfiusumi 1. april 2020-imi akileraarutit Inatsisartut inatsisaanni § 2, imm. 1-imi nr. 1-5-imi taaneqartut taamaallaat 50 %-iilik akiliissapput, 1. april 2025-ip akileraarummik tamakkiisumik akiliisalernissap tungaanut ukiumut 10 procentpointinik qaffakkiartuaartinneqartunik</p>

3. Pisortanut aningaasaqarnikkut allaffissornikkullu sunniutissai

Qamutininik motorilinnik nunaannakkoortunik minnerusunik sisamanik amerlaneruiluunniit assakaasulinnik eqqussinnermut akitsuuteqartitsinngikkallernerup kingunerissagaa iluanaarutinit 2 mio. kr.-it missaannik annaasaqarnissaaq naatsorsuutigineqarpoq.

Biilinut innaallagissamik ingerlatilinnut aammalu plug-in hybridbiilinut qamutinut motorilinnut akitsuummit nutaamit isertitat siunissami 2,3 mio. kr.-it missaannik iluanaaruteqarfiussasut naatsorsuutigineqarpoq. Pluginbililiinnaat 1.800 kg sinnerlugit oqimaassusillit 1,5 mio. kr.-it missaannik iluanaaruteqarfiussapput.

Siunissaaq ungasinnerusoq eqqarsaatigalugu atuisut pisiortoriaasaata allanngoriartornera iluatigalugu iluanaarutit 0,5 mio. kr.-it missaanniissasut naatsorsuutigineqarpoq.

4. Inuussutissarsiornermut aningaasaqarnikkut allaffissornikkullu sunniutissai

Siunnersuut inuussutissarsiutinik ingerlataqartunut, qamutinik motoorilinnik taamaallaat innaallagissamik brintimillu ingerlatilinnik kiisalu plug-in hybridbiilinnik atuereersunut aningaasatigut sunniuteqassaaq, taakkumi qamutit motorillit akitsuutaannik maanna akiliisalersussaammata.

Namminersorlutik inuussutissarsiutinik ingerlataqartunut allaffissornikkut sunniuteqassangatinneqanngilaq.

5. Avatangiisinut, pinngortitamut inuillu peqqissusaannut sunniutissai

Siunnersuut ilaatigut biilit innaallagissamik ingerlateqartut annertunerusumik ingerlatsinermi aningaasartuuteqalernissaannik nassataqartussatut ilimagineqarpoq, tamatumalu biilinnik innaallagiatortunik tuniniaaneq sunnersinnaavaa, qamutinillu motoorilinnik nalinginnaasunik amerlanerusunik eqquusuilernermik nassataqarsinnaalluni, taamaattoqarneranilu partikilinnik navianartunik silaannarmut aniatitsinerup annertusisinnaanera aarlerinaateqarpoq.

Plug-in hybridbiilit qamutinut motoorilinnut akitsuummumut ilanngunneqarnissaat plug-in hybridbiilit siaruariartornerannik annikinnerulersitsissasoq ilimagineqarpoq. Manna tikillugu plug-in hybridbiilit avatangiisinut pitsaaqutai nalornissutaapput, taamaammallu siunnersuutip partikilinnik aniatitsinermut sunniutissaa siumoortumik oqaatigiuminaalluni.

Qamutit motorillit nunakkoortit minnerit qamuteralaalullu akitsuummumut ilaajunnaarsinnissaannik siunnersuuteqarneq, taakku atugaanerinnik annertuseriartitsisussatut ilimagineqarpoq, taamaalillunilu qamutinit motoorilinnit taakkunanga CO₂-mik aniatitsinerulernermik nassataqassaaq.

6. Innuttaasunut sunniutissai

Innuttaasut qamutinik motoorilinnik akileraarutinik maannamut akiliisussaasimangitsut inatsisip atuutilernerata kingorna akileraarutinik ukiumoortumik akiliisalissapput.

Innuttaasut allaffissornikkut sunnerneqassangatinneqanngillat.

7. Sunniutit allat annertuut

Inatsisissatut siunnersuut allanik annertuunik sunniuteqassangatinneqanngilaq.

8. Oqartussaasunik, kattuffinnik il.il. tusarniaaneq.

Siunnersuut annertunerpaatigut tassaavoq siunnersuummik Naalakkersuisunit UKA 2018-imi saqqummiunneqartumik, naalakkersuinikkulli pissutsit pissutigalugit tunuartinneqartumik, saqqummiusseqqinneq. Siunnersuut una imarisamigut 2018-imi siunnersuutigineqartumut sanilliulluni taamaallaat makkunatigut allaassuteqarpoq:

- Qamutinuut mootorilinnut innaallagissamik brintimilluunniit ingerlatilinnut akileraarut akileraarutip tamarmiusup taamaallaat 50 %-eraa.
- Plug-in hybridbiilit akileraarutaat akileraarutip tamarmiusup taamaallaat 50 %-eraa, taamaattorli 2025 tikillugu ukiumut 10 procentpointimik qaffakkiartuaassalluni, taamaalineranilu akileraarummik tamakkiisumik akiliisoqartalissalluni.
- Siunnersuut igitassanngortitsinermit akiliuteqartitsinissaq pillugu aalajangersakkanik imaqanngilaq.

Tamanna tunngavigalugu siunnersuutip aammaarluni tusarniaatigeqqinnissaa pisariaqartutut isigineqanngilaq. Taarsiulluguli UKA 2018/197-imi inatsimmut nassuiaatini tassungalu ilanngussani tusarniaaneq pillugu nassuiaat aammalu tusarniaanermut akissutit innersuussutigineqarput.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Politiit ikiuiartorasuaataasa alapernaarsuinerminnilu biiliisa akitsuutinik akiliisussaatinneqannginnissaat siunnersuutigineqarpoq.

Ikiuiartorasuaatit alapernaarsuinermilu biilit qamutitut motorillit paasineqassapput, politiit ilaatigut isertitsivimmiittunik tigummigallagaasunilluunniit angallassinermut atortagaat.

Aammattaaq qamutit motorillit tuttuuteqarfinni, nersussuaateqarfinni, savaateqarfinni assigisaannilu atorneqartut akitsuusigaannginnerat aamma atuutissasoq siunnersuutigineqarpoq, inuussutissarsiummik ingerlatsineq illoqarfiup imaluunniit nunaqarfiup killingata iluaniippat.

Ingerlatap inuussutissarsiutitut pingaarnertut ingerlanneqarnissaa akitsuuteqartitsinnissami piumasqaataavoq. Tassani isertitanit tamarmiusunit 50 procentimit amerlanerusut tuttuuteqarnermit, savaateqarnermik nersussuaateqarnermillu isertitaanerat pineqarpoq.

Nr. 2-mut

Siunnersuutigineqarpoq qamutit motorillit taamaallaat innaallagissamik brinitimilluunniit ingerlateqartut oqimaassusertik tungavigalugu biilnut nalinginnaasunut akileraarutip 50 %-inik ukiumut akileraaruserneqassasut.

Aammattaaq qamutit motorillit nunakkoortit mikinerit sisamanik amerlanernilluunniit assakaasullit kiisalu snescooterit qamutit motorillit akitsuuteqartussaataitasut nalunaarsorneqarneranni ilanngunneqassasut siunnersuutigineqarpoq. Akitsuut kr. 0,00-inut aalajangersarneqarpoq.

Aalajangersakkami assersuutigalugu ilanngunneqarput ATV-t aamma UTV-t tassaasut qamutit motorillit immikkut ittut nunaannarmi ingerlanissamut tulluarsakkat, taamaattumillu manngertumi assersuutigalugu betonimi imaluunniit asfaltimi ingerlanissamut tulluarsagaanngitsut. Qamutit motorillit sisamanik assakaasoqarajupput kiisalu minnerusumik usinut ilitsiveqarsinnaallutik. Qamutit motorillit aquneqartarput motorcykelit aquutaasa assinganik aquuteqarlutik.

Nr. 3-mut

Siunnersuutigineqarpoq ullut piffissaagallartillugu akiliiffissat tassaassasut ulloq 1. april aamma 1. oktober aammalu ullut akiligassanngorfissat kingulliit tassaassasut ulloq 30. april aamma 31. oktober.

Piffissaagallartillugu akiliiffissaq nalliuttuuppat arfininngornerulluniluunniit, akiliiffissaq uluinnarmut tullermut sivitsorneqassaaq.

Nr. 4-mut

Inatsisartut inatsisaanni atuuttumi § 2, imm. 4-mi innersuussutigineqarput Kalaallit Nunaanni eqqartuussisarnermi inatsimmi kap. 7-imi maleruagassat pinngitsaaliinikkut akilersinniarneqarsinnaaneriniq imaqartut. Pinngitsaaliilluni akiliisitsineq akileraarutinit akitsuutinullu piumasagaatit allat assigalugit ingerlanneqarsinnaavoq.

Eqqartuussisarnermi inatsit qanga atuuttoq innersuussinermi pineqarpoq. Akileraarutit akitsuutillu piumasarineqartut pinngitsaaliinikkut akilersinniarneqarsinnaaneri pillugit maleruagassat Kalaallit Nunaanni eqqartuussisarnermi inatsimmi maanna atuuttumi (Lov nr. 305, 30. april 2008-meersumi) kapitali 47-mi allaqqapput.

Innersuunneqartup allangorsimanera aalajangersakkatut siunnersuutigineqartukkat aaqqinneqarpoq.

Nr. 5-imut

Taaguut ”Landsstyret” Inatsisartut inatsisaata atuuttup danskisuuani § 1, nr. 3-mi aamma § 8, imm. 4-mi atorineqarpoq. Taaguutit Inatsisartut inatsisaanni atorineqartut aalajangersakkatut siunnersuut aqqutigalugu Namminersorneq pillugu inatsimmut naapertuuttunngortinneqarput.

§ 2-mut

Inatsisartut inatsisaat 1. januar 2020-imi atuutilissasoq siunnersuutigineqarpoq.

Imm. 2 ikaarsaariarnermi aalajangersagaavoq 1. januar 2025 aallarnerfigalugu plug-in hybridbiilit tamakkiisumik akitsuuserneqarnissaannik kinguneqartussaq.

Ikaarsaariarnermi 1. april 2025-p tungaanut akitsuutit ima qaffatsikkiartuaarneqassapput:

- 1. april 2020 aallarnerfigalugu: Akitsuutip tamakkiisup 50% -ia.
- 1. april 2021 aallarnerfigalugu: Akitsuutip tamakkiisup 60% -ia.
- 1. april 2022 aallarnerfigalugu: Akitsuutip tamakkiisup 70% -ia.
- 1. april 2023 aallarnerfigalugu: Akitsuutip tamakkiisup 80% -ia.
- 1. april 2024 aallarnerfigalugu: Akitsuutip tamakkiisup 90% -ia.